

續修萊蕪縣志

第一冊

萊蕪縣舊志序

嘉靖癸巳予以部主事差徐取道萊蕪見川山斗峻風物樸茂  
吾章僅百里止聞爲山邑不知其亦一樂土也詢之故老則云時  
平而耕牛遍野兼之樵蘇足以糊口或郊多走馬則砦柵團結亦  
可免於寇兵但尙氣貫勇號稱難治長吏若善導之實力於用也  
予素喜堪輿之學隨所之卽欲訪問封土沃礪民風敦薄時李令  
逆於境上首索縣志觀之答以自昔未有令欲修之恐未精也然  
而有所待爾山東通志初成適方巡以一帙見寄遂披閱之客中  
攜書不多參以齊魯寰宇記一統志輿地三齊等記迺知縣名萊  
蕪漢所置也國朝因之周爲夾谷唐入博城宋隸慶府歷代分屬

萊蕪縣志

卷首

序

一

濟南善成印務局承印

割裂雖有異同然屬泰安獨多國朝亦因之其大凡雖可考見而  
其詳則無由與知罷歸林下八年於茲矣章志雖云草創尙未敢  
出以示人而少渠陳君於政務叢集之餘號稱難治之地迺能撫  
故實採新聞而爲萊蕪一佳志予之閒居無事者有愧多矣陳君  
尹萊三年矣報政在卽使使持書以序文見委予恨不得見萊志  
者十有六年今何幸見其志而又以序人託其端哉人之言曰世  
後而文繁如稗官小說里巷調言劣詩瑣文無益身心不關政教  
是誠繁矣而志也者顧可少哉九邱邈矣夏周職貢秦漢郡縣唐  
圖十道宋述九域今據其書雖後千百載而此身如在當時不觀  
乾象豈知泰安爲角宿之根不察地維誰識城池迺方城之險是

故志圖考而萊之城境縣志學圖備矣志地理而萊之沿革封疆鄉保形勝街里市集叙矣志貢賦而萊之土田差糧戶口及倉庫物產悉矣建設志而城池公署郵傳坊表津梁祠祀古蹟無不概見政教志而學校風俗秩官名宦下及兵防無不兼該人物志而鄉賢孝義貞烈科貢如在目前文章雜志而碑墨序記雜著八景如指掌上無一字之虛文爲千載之實錄陳君青年博學有規措之才警敏之智臨政略無難色而綽有能聲刑清事簡有餘力而爲是舉固有以也予雖閒而神疲志怠章志宜其無成也雖然請教容有日矣

賜進士出身中順大夫太常寺少卿致仕前吏部文選司郎中章

萊蕪縣志

卷首

序

二

濟南善成印務局承印

邱中麓山人李開先撰

萊蕪縣原志序

嘉靖甲辰余試政都省迺冬奉萊蕪檄入其境望羊祜之巔弔史雲之祠陟安期之山訪孟止之亭求季嗣之墓廢悲存仰愴然一時延父老不能談質文志而未叻喟曰閱哉茲典比邑務狼籍多於志闕欲講弗遑也踰年一日會明倫羅學子數人構省郡成書授以纂草值修朝覲濱行揚生旌伯等亦略草二帙始閱而載探未備再閱而疑訛未析三閱而品次未章難於入梓也寢之又年矣丁未二之日爲余叨滿期邑人士暨諸寮與執爵請曰君入羸三歲修敝葺頽率有成績君舉縣書獨無成是行得無憾乎哉余

惟志也者載故而飭實也故叙古而略者遺沿俗而誤者誕校讐而淆者爭有一於是難以徵遠矧萊當肇志而兼三議茲余所爲懼者於是僚士諸人復執爵進曰願君無辭爲猗惟我皇明建茲非一日吏茲非一人而鉛槧不存實錄無著者其初不專因循而或居避忌也設君復持后恤是志終無成日矣乃引子厚議退之避史錄不就以志比史錄利害重輕反覆言之余讓不可爰退檢舊帙稍稍改訂析一邑之紀表古賢之蹟出以應所請曾未數月之功爾噫是書出非以信今將俾今不吾信而吾辨也非以傳後將俾後不吾傳而吾正也辨已正已斯爲成書而曷恤乎不吾信與傳昔者遷史之失溫公之缺子由糾之補之遂附爲古史以明

萊蕪縣志

卷首

序

三

濟南善成印務局承印

示後世追錄聖賢識者凡以歸諸失缺之功爲二司馬之幸今之

邑志非古列國之史歟嗚呼而今而後吾安得有如宋蘇子者

古閩莆少渠陳甘雨撰

重修萊蕪縣志序

明興我文皇帝御極詔郡邑纂修地志其時萊業有志今莫可考鏡云嘉靖中莆田陳公來令是邑蒐羅故實創爲一書垂今五十年餘中間風尙有醇漓文物有盛衰歲異時殊莫可仍也今滋陽魯公銜命來振鐸斯土取舊志覽之輒增慨曰夫志也事貴核實文尙明信其有出於舊志之前而未能紀者當補書有出於後而未及紀者當續書有涉於臆言風聽溷廁無倫者當訂正書乃謀

諸邑侯王公學博劉公及邑諸士夫輩割俸捐貲共襄其事凡五月而告竣不佞獲手讀之見其分卷著類刪繁去贅人各爲傳事總爲斷大要不掩實不溢美一以標隱行厲士風爲主其事則諸君子之所採摭其義則魯公之所獨裁也較之前志大綱細目亦既章章稱備矣信不朽之鴻編誠一邑之實錄噫嘻魯公之注意其殷以篤乎吾萊之文獻其日以新乎由之法今傳後徵往俟來俾覽者稽宦牒而思治睹鄉評而思賢觀山川土田而思興廢之故考民風物產而思隆替之倪庶幾哉聖賢過化之故疆臻俗美風同之盛於以上翼夫大明統一之化者與有賴也其爲吾邑長價當亘古常新已魯公英齡博雅士類著鑑鼓鑄之暇成此懿舉

萊蕪縣志

卷首

序

四

濟南海成印務局承印

蚡峽出入清華載筆承明爲國史持衡也萊志云乎哉余朽鈍弗能文竊附世講樂觀鄉史有成且以復公之命敢僭序如此

邑人吳來朝撰

萊蕪縣增修志序

郡邑吏始謁當途例得以志爲贄小子承乏燕山樞趨諸貴公隸人持邑志見告披閱一過疑信雅俗俱不可知但聞其修於滇南王令授簡魯學博蓋在今上萬曆丙申秋也相距數十年墨守舊章其間豈無興革方冊闕如後有作者漸成軼事適元給諫先生以奉使歸里式廬問政相與揚推邑乘共對唏噓頗有文獻不足之感簿書旁午未遑修舉秋杪謀諸先生約與更始先生以吏屬

掌記當煩校讐余謂非常之原必得宗公巨眼然後筆底春秋且傳舍萍蹤非居官而長子孫安所取月旦評之先生欣然搦管是誠在我無煩使君於蒐輯舊聞從柴李兩廣文集諸生講求斷煙荒草若存若亡又不肯輕以耳食字比而句櫛之五閱月始告成其於天文地理仰觀俯察無訛謬焉於錢穀戶口按圖索籍無差殊焉於節義忠孝微顯闡幽無遺漏焉於流寓仙佛制誥藝文之類探奇選勝旁集博採無附會缺略焉每敘事必掇以議論披郤導窾諷切時事令觀者栩栩神往有寥然千古之致噫亦既盛矣粵稽獲麟絕筆之後嘆兩司馬史記特著三國陳壽始有志晉魏以來國史家乘遞相沿襲甚且夷爲野史萊於今日亦禮失而求萊

萊蕪縣志

卷首

序

五

濟南善成印務局承印

諸野然一經大創其作始艱其徵信遠宮汶不朽此書亦不朽稿既脫先生以使竣報命雍時李公相繼趨闕下請假暫歸有計部吳公先生以詮次相屬是書也秉筆登壇給諫爲政計部公實受成事餒勒之役則有司存

知萊蕪縣事濠上胡士奇書

新修萊蕪縣志

凡例

一志名新修重新朝也萊志始於宋尉鍾離修弗可攷矣撰於明嘉靖之陳公者爲舊志如重修增修皆在萬曆年間新朝定鼎以來將三十年前令鍾君纂輯未竟予所引用各註於

本條下原所自也其不書所出者皆新入

一志分十卷卷中款項各弁以序卷後有跋語或從原志或斷以臆見大約在前者新修在後者舊本

一建置舊蹟雖廢必書重掌故也

一秩官功崇德懋已入名宦者有傳其可備崇祀者謹列之以俟將來外有一二可採者書本名下以備參攷

一人物惟祀於鄉賢祠者有傳其有待公舉者特立傳以俟論定如見聞所弗及姑闕以俟後人

一制誥爲王言之一載在國史譜入家乘從無採入志書之例謹爲刪削

## 萊蕪縣志

### 卷首

序

六

濟南善成印務局承印

一闡幽旌淑首重節烈使窮簷蔀屋之婦皆得藉以有聞於世而節婦查往例非奉旌表者不錄然荒山下戶無階上達勢將湮沒故原志所載旣不忍刪新入者猶恐遺漏當廣爲搜訪以俟續修

知萊蕪縣事葉方恆學亭父識

## 萊蕪縣志序

周官外史掌方志是史與志合扶風易書爲志則史與志分然志闡史裁則俚夾滌以爲難至區爲邑志則更有難且重焉者蓋邑志非徒備掌故已也舉凡地域山川戶口賦入學校典禮習尙人才展玩瀏覽無不犁然在目古所詔地事觀事胥眡此爲根據合

而爲省志一統志亦視此爲導源即新政之改良發展亦以此爲把握政教所關豈不急之務哉朱子守南康下車即徵郡志者此物此志也第輯志之難首虞文獻不備次虞開報不公而關鍵總在於文獻昔陸清獻宰靈壽時奉部檄徵志書急當時民獻凋謝遺文墜地將伯四顧著手無從穆然徒見溇沱流大行時而已幸有傅氏維樸閱舊者之就湮悲來者之無藉網羅方聞彙輯成編藏於家塾清獻蒐求付梓便如披荆榛而獲完璧真定三十二縣而靈壽不至獨歎夫陸沈文獻所繫不綦重歟吾萊志書創於葉明府值前清景運熙洽之會亦吾邑人文鼎盛之期二百年來甲門盛德浩如煙雲之過目且舊志散軼棗梨漫漶累瓶譬對往往

萊蕪縣志

卷首

序

七

濟南善成印務局承印

不能卒業徒令人廢書浩歎而已尤可悲者問冠山幾如靈鷲能飛詢祝其則如瑯琊善徒夾谷爲聖蹟所留究依何山何水止羸傳子輿芳躅確係何落何村經傳所載尙未見地著能詳况地俗質文盛衰之故人事變遷得失之由而欲索南董於局外逝水更誰問哉馬鄱陽所謂雖聖人不能爲臆說者也族弟雪安蚤歲即有見於此業帖括而志未逮也甲午歲邑侯周公倡議修舉委雪安執牛耳乃功未半而格於事嗣後雪安觀政容臺崎嶇淪鼎之會義不及鄉井者十餘年民國以來杜門謝客討論古今斟酌名例蓋無日者不以博採參訂爲事丙辰張公蒞茲土與雪安函面交商決議修舉乃未開辦而又格於事愚於雪安誼如蘇長公言

兄弟而友生者也乃函告之曰文章憎命吾輩素有達觀生茲土無負茲土亦惟踵靈壽故事以待稼書其人可也間一歲而書成分門十爲卷二十有二舊志蓋嘗是正俾愜於信今新志務希精覈倍懷於傳後雖合否史裁不敢妄議然於地事觀事之詔及省志一統志之修夫固有實錄在焉覽者援靈壽傅氏之孤詣而因識夫今日作者之苦心則是書雖千古可也若謂一邦之文獻在是諒非作者之所及知矣己未春同人憇恩勸付手民故於現世體例未暇續究留以俟後之君子己未三月張餘九序

### 萊蕪縣志序

昔萬季野先生論史局分修之失曰昔遷固才既傑出又承父學

### 萊蕪縣志

#### 卷首

序

八

濟南善成印務局承印

故事信而言文其後專家之學才雖不逮猶未至如官修者之淆亂也官修之史倉猝成於衆人不暇擇其材之宜與事之習是猶招市人而與謀室中之事也予嘗深韙其言夫分修之失豈特國史云然哉由國史而推之下而至於一行省又下而至於一郡又下而至於一州縣其事蹟莫不各勒爲成書卽莫不具有國史體裁州縣之書率數十年一修官自爲監而令諸幕友任纂修邑之人任采訪分門編輯劃然不相合併而此諸幕友者淺陋無文不能博考精思於邑之地理人物風俗茫然一無所聞見僅據舊志之文與邑人之所採敷衍成篇自相矛盾首尾橫決令人讀未數行啞然失笑豈非以材之不宜與事之不習哉昔者梅嘗竊怪康

對山作武功縣志張蒿菴作濟陽縣志以彼碩鴻學儒何必區區於是今乃知兩先生所以區區而爲此者實愍一邑之掌故盡湮沒於分修者之手故輯而存之非得已也余邑之志創始不知何人至清康熙間邑侯葉學亭氏始更修之彬彬然規模大備矣然其中舛錯實不可枚舉其大者如汶水名稱混淆且屬入泰安新泰之汶舊萊蕪城不知在今博山舊博城不知非城子縣其他如人物建置災祥牴牾尤多雖曰沿舊志之失亦以纂非一人成非一手所致余旣病葉書之失因重加編輯作水攷以正其訛沿革則改用葉佩滄續山東攷古錄以外別立大事記一門忠節一門儒林文苑各一門皆葉書所無也其康熙以來二百餘年之事則萊蕪縣志

卷首

序

九

濟南善成印務局承印

采府志及碑銘墓志詩文專集爲之書成鈔存於家將以備後來爲志者之采擇如所云史料也者非敢妄有所造述也然亦稍異於分修之書使續成者之迷於向背矣張蒿菴先生曰作器者必先樸樸苟具矣乃礪之錯之塗髹之而亦爲良當亦國工之所樂藉也吾於是書亦云張梅亭敘

續修萊蕪縣志序

事竟成者志也山川文物等蒐輯成帙亦志也雖志之意義不同然非有志者不能成斯志也攷萊志失修已二百餘年矣至若山川之支脈疆域之沿革文物之隆替以及政治經濟社會風俗之盛衰措紳先生多難言之癸酉冬鍾豫來守斯土從政有暇與諸父老相周旋語及縣志失修率皆深以爲憾甫月餘適奉

民政廳李蔭軒廳長命令續修縣志自謂有此良機萊邑二百餘年之掌故一旦彌闕補漏彙爲巨帙自當斐然可觀甲戌春初擬招集全縣士紳籌議進行旋以匪患不果迨至秋暮從事招集僉謂事關文獻當以鄭重從事乃票選許輔之王景沂元養齋先生

萊蕪縣志

卷首

序

十

濟南善成印務局承印

擔任編纂復於十區中每區公推採訪數員縣志局于焉成立由是廣搜博採察訪無遺並參以張雪菴先生私修遺稿先生舉進士清末宦遊燕京夙號研究史地專家東魯諸生從遊門下者不可勝數萊志經久不舉此次續修雪菴先生之遺稿厥功匪尠猶賴元養齋諸先生以耆艾之年披編削簡不辭勞瘁採訪諸君實事求是盡力搜羅志稿已草創歲事惟在字裏行間有當修飾而潤色焉行將付梓綴序於次備述斯志續修之所以成後之人手此一編當明萊志中斷之久其或表同情於有志者成斯志之意也夫

中華民國二十四年三月

縣長李鍾豫

續修萊蕪縣志序

六經皆史也書長於政而九功敘詩長於風而民心正禮以節民性樂以和民情古帝王因時制宜凡以爲民耳東周以後紀綱廢弛而天下亂孔子懼作春秋以道義繫易發窮變通久之蘊以道化刪定六經欲以救萬世之天下爲千古史筆之祖馬班而降述作紛紛重皇家而輕士民言之恐爲上所忌者雖關乎家國良謨不敢載事之不爲上所喜者雖關乎民生大計不敢書故雖史書典志浩如烟海皆爲粉飾太平之具起視斯民苟安一時滋生蕃衍則逸居無教大亂之世殺人如麻則雞犬不聞觀二千餘年之舊史芸芸衆生盛衰榮瘁如循環然何代非聽其自生自滅也哉

萊蕪縣志

卷首

序

一一

濟南善成印務局承印

曾子曰上失其道民散久矣慨乎其言之也使曾子而見戰國以後之天下不知又如何長歎太息矣縣志權輿於周禮小史外史掌邦國四方之志自漢唐而宋代有作地方志者歷元迄明始邑各有志清康熙時詔天下郡縣各修志書則數百年之著述何啻萬千總之詳於科名仕宦而略於民庶且賤視工商此實爲國家貧弱漫漶之一大原因今日者海禁大開民治潮流排山倒海而來國體變更二十餘年導師先逝主義空存不知發揚國性喚起羣倫咸醉心歐化欲移西法於中國以爲富強可立待也乃屢經試驗而無效且國勢阡危而益岌岌不可終日迫於環境始恍然於吾所以立國之道必求諸己而無事外取以固有之道德樹其

基而發揮其精神以固有之物產利其用而研究其進化保衛之團體以訓練而堅固之合作之事業以組織而永久之一切不良之習慣以改革而擴清之雖然徒託空言無補也貴徵之事實則由舊政而度於新政於是溝通之道尙矣域地山水猶昨也觸目皆是新機而地質氣候水利不可不講政教官吏猶是也遇事皆屬新猷而民治實業教育不可不備人物不可謂非舊而出仕者強項而愛民家居者孝義以化鄉里則不舊而新矣藝文之編纂擇其關乎地文與關乎世道人心者著之於篇使閱者感發興起而趨於善父老轉相告語婦孺互相傳聞當有鬻乎鼓軒乎舞而相契於文字之外者所謂立言不朽以實不以文者也大事記尤

萊蕪縣志

卷首

序

一二

濟南善成印務局承印

多近世切膚之痛則身受者感激彌深臥薪嘗膽發奮圖強胥賴是也雖然吾萊山嶺起伏鬱而不舒無富豪大賈因無大規模之建設志書所載不過就少有經驗者以爲先河之導而已縣志失修近三百年此次纂修限期甚促因舊志與張志者十之四補闕拾遺者十之二近事增加者十之四共十三册三十八卷新舊會通本末一貫而世變之亟瞬息千里物質文明亦竿頭日進數十年後重修斯志吾國其庶幾乎是則讀是志與述是志者之所深思遠慮翹企而待之者也

民國二十四年三月下浣

元因培敍

續修萊蕪縣志敘

縣志之攸關夫人而知之續修縣志之必要亦夫人能言之茲不復贅姑就是書成立之資藉與讀是書者應存之感想略述一二以貢左右吾萊縣志失修已二百餘年鍾陳諸書既不得見卽葉侯所修存者亦寥若晨星抑又殘缺漫漶不能卒讀清光緒甲午之歲邑令周慕僑邑紳呂黻卿等倡議重修推張雪安先生主總纂之任是時編校者有王書玉張丹臣採訪者有盧棟臣景宗藩諸前輩網羅搜輯不遺餘力乃役未竟而中寢而先生旋觀政容臺其事遂閣民國成立先生掛冠旋里檢點舊稿半爲通志採訪員攜去幸家藏副本於是補其缺略正其謬誤博訪周咨旁徵遠

萊蕪縣志

卷首

序

一三

濟南善成印務局承印

引用書有百餘種之多歷時至六七年之久暇則竹杖芒鞋或策疲蹇詳察夫山之脈絡起伏川之源流分合作水攷以糾前志之失辨羸博故城以解舊說之紛稿凡五六易而書以成曾與先生以至戚而兼師生昕夕過從得與商榷其格式訂正其謬訛編輯校閱克效綿薄以無力付梓與曾分鈔成帙藏諸篋笥以供後來修志者之採擇小兒化濡恐其久而散佚也鳩合同志元欽蘭李海芬元岱宗畢玉聲元逢吉元隴輝等捐貲付石以廣其傳此張志之所由出也自是書出而吾萊文人學士始知縣志一書爲嗜古者之不可一日缺然仍斷代爲書民國而後概付闕如且其書付石之時迫於經濟原稿所存割愛正多現奉上令續修各縣縣

志 縣長李招集各界紳董推選元君養齋許君輔之充編纂之任並命曾追隨其後固辭不獲乃與二君議決以張志爲藍本而凡原稿之所未刻與舊志之所已載者概行補入以昭存古外又徵集各家譜牒碑記傳誌所載前人之嘉言懿行有關風化者酌採若干以資矜式民國而後所應列入諸端則憑各區同志之採訪與專門畢業諸君之貢獻及個人聞見所及博采約取應有儘有要不出乎憲定範圍之外依限期而書以成噫門類之多若此手續之繁若此鄉無張志無論其他卽山川道里一門不知費幾許時日勞幾許心血而攷察之確否尙未可知且二百餘年之掌故其中斷而不能續者更不知凡幾然則張志之有功於吾書當

萊蕪縣志

卷首

序

一四

濟南善成印務局承印

爲同志之所公認故於是書之成不惜拉雜陳述弁諸簡端以告後之讀是書者蓋亦飲水思源不沒人善之鄙意云爾

邑人王希曾謹撰

民國二十四年三月

續修萊蕪縣志發凡起例分類列目

縣之志乘雖不足以例正史而其因時創紀舉綱分目要不離乎史之體例近是總括以立其主旨縷析以詳其事實庶使閱者瞭如指掌所有一縣之已往及現在靡不釐然於胸中何者爲食舊德宜保存不宜輕棄何者爲擴新機當展進不當泥守實於人心風化攸關甚鉅萊蕪縣志之修萌於宋尉鍾離創於明嘉靖邑侯陳公重修增修於萬曆年間王公胡公及邑紳元給諫公書皆無考陳公創志二冊尙存簡甚稱爲舊志者獨清康熙初知縣葉公學亭之新修雖殘闕而體例尙略具迄今已二百餘年矣清光緒二十年知縣周慕僑公暨邑紳呂紱卿先生張雪菴先生等多人

萊蕪縣志

卷首

序

一五

濟南善成印務局承印

倡修開局經時糜款竟因事而停未告厥成惟當時採輯底稿尙有保存者然核其旨趣難合於現時之著作茲奉令續修要當舊者不失其舊應沿襲者沿襲之新者詳記其新應增益者增益之括以輿地政教人物藝文四志於各志中分門別類一祛浮詞濫聞務求文省事詳與時勢變遷遞嬗之迹象相適合不揣固陋略陳梗概宏博君子幸教正之

邑人許子翼識

續修萊蕪縣志凡例

一縣志志一縣之事實也事實無古今萊蕪設縣自漢始年遠時久所有天然及人爲之事實任設何等科目亦難概全然不外土地人民政治經過之迹象所遞嬗約以輿地政教人物藝文四志以爲容納或免闕漏

一每類篇志前有序引後附論贊殆爲作史定例然陸隴其靈壽縣志吳汝綸深州風土記爲志記中之卓卓者論贊有無亦非一定本志比事屬詞略仿其意

一本縣自葉侯新修後清光緒間嘗設局派員採訪一次惜未經編輯卽因事停止迄今又已四十餘年新舊過渡事務紛

萊蕪縣志

卷首

序

一六

濟南善成印務局承印

繁既憑各區採集查送並檢定前次底稿匯同編輯庶前人心力不致空廢

一世運遷流今昔異宜泥守舊例實多扞格本志於新增事項恐有疏略非敢徇今薄古乃導揚新機增益人生爲理勢之當然

一絕地度天終難適合區區縣境分割躔度不無參差原志載星野一門引證論辨頗廣終捉影於鄒魯齊衛之交於萊邑躔度不得深切著明之一說茲削而不書以俟後之深於天文家者

一守土主政爲蒞萊官吏功德及民爲官吏成績列歷代官吏